



Jess Svane
Inatsisartunut ilaasortaq
Maani

Kræftimik katsorsaaneq pillugu apeqqummut akissut

02-03-2018
Suliap nr. 2018 - 4537
All. nr. 7311942

Kræfti kalaallillu nappaammik tamatumingga misigisaqartut pillugit apeqquteqaravit qutsavigaakkitt.

Postboks 1160
Oqa.: 34 50 00
Fax: 34 55 05
3900 Nuuk

Email: pn@nanoq.gl

www.naalakkersuisut.gl

1. Nappaassuup Kræftip atungaanerat qaffakkaluttuinnartutut isikkullip akiorniarneqarnerani Rigshospitalimut aningaasarpassuarnik atuinermik kinguneqartoq sooruna kisimi atorneqartoq?

Peqqinnissaqarfik tiguneqarmat aamma kræftit ilaannik misissuineq, katsorsaaneq nakkutiginnillunilu malittarinninneq tiguneqarpoq. Kræftit taakkua tassaapput iviangitigut kræfterneq, inalussakkut kræfterneq, aqajaqqup sanilequtaatigut kræfterneq aamma puatsigut kræfterneq. Napparsimasut taakkuningga nappaateqartutut nalilerneqarsimasut misissortinnerat katsorsartinnerallu pitsaasuunissaat qulakkeerniarlugu qanoq ittumik kræfteqarnerat apeqqutaatillugu immikkut ittunik pilersaarusiunneqartarput.

Aamma nappaatinut allanut immikkut ittumik katsorsarneqartariaqartunut tunngatillugu kræftimik nappaatinik immikkut ittunik misissuineq katsorsaanerlu Kalaallit Nunaanni Peqqinnissaqarfik aamma Region Hovedstaden suleqatigiinnerisigut pisarpoq. Kalaallit napparsimasut nakorsap naliliineratigut innersuussineratigullu napparsimmavinnut Region Hovedstaden-ip ataaniittunut assigiinngitsunut nuunneqartarput.

Region Hovedstaden-ip napparsimmaviisa ilaat tassaavoq Rigshospitalet. Rigshospitalet Danmarkimi immikkuullarilluinnartumik katsorsarneqarnissamik pisariaqartitsisunut napparsimmaviit siuarsimanerpaat ilagiinnarnagu aamma kræftimik katsorsaasarnermi nunani tamalaani ataqqisaavoq. Danmarkimi napparsimmaviit aamma allat atorneqartarput, kisianni napparsimmavimmik aamma immikkoortartaqarfimmik toqqaanermi napparsimasup nappaataa, katsorsarneqarnissamik pisariaqartitai peqqissaanermillu suliallit naliliinerat apeqqutaasarput.

2. Danmark-imi Region-it allat pitsaanerusumik akikinnerusumillu nappaassuup akiorniarneqarnerani katsorsaasinnaaneri periarfissatut misissorneqarsimanerlutik?

(Apeqqummut 1-imut akissut aamma takuuk) Katsorsaariaatsit, napparsimasut ingerlaarnerat innimiginerallu kiisalu aningaasaqarnikkut inissisimaneq eqqarsaatigalugit immikkut ittumik nunani allani katsorsarneqarnissamut periarfissat – matumani kræftimik katsorsaaneq ilanngullugu – Kalaallit Nunaanni Peqqinnissaqarfimmit ingerlaavartumik nalilersorneqartarpoq. Taamaalilluni peqqissutsikkut sullissinermi periarfissat sinaakkutillu pitsaanerpaat eqqarsaatigalugit suleqatigiinnissamik isumaqatigiissusiortoqartarpoq.

Pissutsit qulaani eqqartorneqartut eqqarsaatigalugit Region Hovedstaden napparsimasunut immikkut ittumik katsorsarneqarnissamik pisariaqartitsisunut tunngatillugu suleqatissatut naleqqunnerpaavoq. Tassunga atatillugu Kalaallit Peqqissartut Illuata inissisimaffia eqqaaneqarsinnaavoq, taanna Rigshospitalet-imut qanilluinnarpoq taamaalillunilu napparsimasut ingiallortillu assigiinngitsutigut aamma oqaatsitsigut peqqissutsikkullu ikiuinissamut periarfissiilluarluni.

Kalaallit Nunaanni Peqqinnissaqarfiup nunap immikkoortuani qitiusumik napparsimmaviit allat isumaqatigiissusiorfigissappagit napparsimasut Danmarkimi tamarmi assigiinngitsuni napparsimmavinniittut ikiorserniarlugit atortut angallannikkullu attaviit amerlanerusut pisariaqartinneqassapput.

3. Kræftertutut paasineqarnermiik pinngitsoorani ullunik killiliilluni katsorsartissinnaalernissamut qularnaarussisarnissap inatsisiliuunneqarsinnaanera periarfissaqarpa/pilersaarutaava?

Misissuinermut katsorsaanernullu tunngatillugu assigiinngitsut pingaaruteqarput, ilaatigut inoqarfiit inissisimanagerat attaveqatigiinnermilu atugassarititaasut kræftimik katsorsaanermi unammuniarnarsinnaasut. Tamanna pissutigalugu piffissamik utaqqiffissamik aalajangersaanissaq katsorsaanissamillu qularnaveeqqusiinissaq sapernarsinnaavoq.

Kræftimik katsorsaanermi immikkut ittumik katsorsaasoqarnissaa pisariaqartinneqartarpoq. Taamaattumik katsorsaanissami qallunaat napparsimmavii suleqatiginissaat pisariaqartipparput. Taamaattumik isumaqarpugut maanna kræftimik katsorsaaneq atuuttoq, aamma Kræfti pillugu pilersaarut 2013-imi allaatigineqartoq, katsorsaanerni neqeroorutigisinnaasatsinni pitsaanerpaasoq.


Naalakkersuisut nalunngilaat Nunatsinni Danmarkimilu katsorsaaneq napparsimasunut artornarsinnaasoq, soorlu inuttut atukkat, inuuniarnermi aningaasaqarnikkullu

ajornartorsiutit eqqarsaatigalugit. Taamaattumik qanigisaasut napparsimasumik peqateqarsinnaanissaannut periarfissaasut misissoqqissaarnerat aallartissimavarput, aamma katsorsaaneq qanoq pitsaanerpaamik tapersersinnaanerlugu eqqarsaatiguarparput. Tamatuma saniatigut napparsimasut, qanigisaasut peqqissaanikkullu sullissisut kræftimik nappaateqarnermut tunngatillugu unamminiarnartut nalaattagaat malinnaaviguarterpavut.

4. Nunatsinni najugaqartut kræftertut paasineqarpata Danmarkimilu suliaritittariaqartut paasineqarpat Danmarkimi kræftertunut suliaritilereernissamut qularnaarussisarneq atuutsinneqartarpa?

Naamik, qallunaat suliaritinnissamut qularnaveeqqutaat kalaallinut napparsimasunut atuutinngilaq. Nalilerneqarporli kalaallit inuunermik ulorianartorsiortitsisinnaasumik nappaatillit ullut 30-t iluanni Rigshospitalet-imi katsorsarneqarnissamut aggersarneqartartut.

Inussiarnersumik inuulluaqqusillunga


Agathe Fontain

15. februar 2018

Inatsisartut suleriaasianni § 37 imm. 1 naapertorlugu Naalackersuisunut apeqquut imaattoq matumuuna saqqummiuppara:

Naalackersuisunut apeqquut:

- 1. Nappaassuup Kræftip atungaanerat qaffakkaluttuinnartutut isikkullip akiorniarneqarnerani Rigshospitalimut aningaasarpassuarnik atuinermik kinguneqartoq sooruna kisimi atorne-qartoq?**
- 2. Danmark-imi Region-it allat pitsaanerusumik akikinnerusumillu nappaassuup akiorniar-neqarnerani katsorsaasinnaaneri periarfissatut misissorneqarsimanerlutik?**
- 3. Kræftertutut paasineqarnermiik pinngitsoorani ullunik killiliilluni katsorsartissinnaalernissa-mut qularnaarussisarnissap inatsisiliuunneqarsinnaanera periarfissaqarpa/pilersaarutaava?**
- 4. Nunatsinni najugaqartut kræftertut paasineqarpata Danmarkimilu suliaritittariaqartut paasi-neqarpat Danmarkimi kræftertunut suliaritilereernissamut qularnaarussisarneq atuutsin-neqartarpa ?**

(Inatsisartunut Ilaasortaq Jess Svane, Siumut)

Tunggavilersuut:

Nappaassuup nunatsinni tusarsaaleraluttuinnartup qaffakkaluttuinnartullu ilaatigut katsorsartissinnaanerup kingusinaartarneranik tusarlerneqartuartarneq milliartunngilaq. Taamaakkaluartoq nunatsinniik katsorsartiiffigissallugit periarfissaqarfigisatuatsitut isigisatta "ulikaaqqajuartarnera" (Rigshospitali) pissutaagunarlu ilaatigut inissaqalernissamut utaqqisoqarsinnaasarluni.

Naalagaaffeqatigiiffiup iluani assigiinngitsunik nappaatillit minnerunngitsumillu kræftimik eqqugaasimasut katsorsartinnissamut suliaritinnissamut periarfissaasa sapinngisamik assigiimmik periarfissartinnissaat anguniarneqartariartutut isumaqarfigaara, isumaqarpungalu tamanna inatsisitigut piumasaqaataasutigullu killissarititaasutigut naleqqusaanikkut anguniartariaqartoq.

Apeqquteqaatimma ullut suliffiusut qulit iluanni akineqareersimanissaat kissaatigaara.